

# Orizont 7

N program culturel ladin per la televizion



Egon Vinatzer.

**Trasmiscions** - N arichimënt mpla tl mond dla televizion tla rujeneda ladina. Cun la trasmiscion Orizont 7, che dura ntëur n trënta menuc, iel muet sun TCA n program nuef cun na idea nueva defin per chësta televizion. Egon Vinatzer de Urtijëi ie l ideadëur de chësta trasmiscion che vën nce menada da dl'ël. L se trata de n program che ti dà pëis ala cultura, ala tradizions populeres, ma nce ala ntraunides nteressantes y dantaldut ala vita da uni di dla jënt dla tiera ladina. "Cun nosta cameres ulons cunté la storia, la vita, l'economia, l'artejanat, l'ert y pea nce i mumënc particuleres dla jënt tla Ladinia. Jiron ite nce tla cëses a s'la ciaculé cun persones che à vivù mumënc particuleres o nce mé per nes lascé cunté si stories. Ulon nce dediché trasmiscions a mëises turondes de nfurmazion o nce de cunfront, ulache l'unirà tratà argumënc atuei y nce soziei. Cun Orizont 7 ulons pité n'alternativa a duta la majera televijions, jiron tres duta la valedes ladines dai mëndri luesc a chëi plu cunesciui y majeri, y da tlo cunterons dal vif dla popolazion, de avenimënc y de de blòta ntraunides", nsci Egon Vinatzer. Ntant, sciche sperimënt, ie la prima trëi trasmiscions unides sponsorisedes dala Region

Trentino Südtirol tres l'assessorat per la scunanza dla mendranzes de rujeneda cun l'assessëur Florian Mussner, che à nce cris ora i prim argumënc. Bele da n valguna enes lëura na troupe de TCA cun lezitënza y legrëza sun chësc program. Tres Orizont 7 uel l'autor y moderadëur dla trasmiscion nueva, Egon Vinatzer, purté tla cëses nce la cosses che n ne aud zënza nia drë. "Datrai iel propi la pitla cosses omles che ie mpurtantes per nosc dauni culturel. Cosses y fac a chëi che l'autra televijions ne dà deguna mpurtanza. Nëus meton sën chisc fac al prim post. Orizont 7 uel diventé n puent sterch y mpurtant danter la valedes y la jënt ladina. Na trasmiscion per ladin ulache duc i cin' idioms se lascerà audì. Na bela maniera lesiera de fé televizion zënza ulëi pertënder l mond, ma ulache l singul possa se identificé y se lascé audì", nsci inant Egon Vinatzer. La trasmiscion ie mueta sciche sperimënt, uderon si dauni.

La trasmiscion Orizont 7 vën data tres sun TCA:

Südtirol TV uni merdi dala 12.00, de juebia dala 19.30 y la dumënia dala 17.30.

Sun Alto Adige TV uni lunesc dala 18.30, de mierculdi dala 20.30 y de venerdì dala 21.15.